

**PEMBERITAHUAN PERTANYAAN DEWAN RAKYAT**

**PERTANYAAN : BUKAN LISAN**

**DARIPADA : YB TUAN WILLIE ANAK MONGIN  
[ PUNCAK BORNEO ]**

**SOALAN**

**Tuan Willie anak Mongin [Puncak Borneo] minta PERDANA MENTERI** menyatakan langkah-langkah yang diambil oleh Jabatan Perdana Menteri untuk memastikan kefahaman orang awam tentang kebebasan beragama itu merangkumi kebebasan untuk tidak beragama, dan kebebasan berfikir, kebebasan nurani hati dan kebebasan kepercayaan.

**JAWAPAN : (YB DATO' SERI DR. MUJAHID BIN YUSUF, MENTERI  
DI JABATAN PERDANA MENTERI)**

Tuan Yang di-Pertua,

Untuk makluman Ahli Yang Berhormat, Kerajaan sentiasa menjamin dan meraikan hak serta kebebasan rakyat negara ini berdasarkan Perlembagaan dan Undang-Undang yang telah diwartakan termasuk hak untuk menganut dan mengamalkan agama selain Islam. Bagaimanapun kebebasan beragama tidak seharusnya diterjemah sebagai kebebasan untuk tidak beragama berdasarkan kepada Prinsip Rukun Negara yang pertama iaitu 'Kepercayaan kepada Tuhan'.

Kepercayaan kepada Tuhan dimaksudkan sebagai bangsa dan negara ini telah diwujudkan atas kepercayaan yang kukuh kepada Tuhan. Melalui kepercayaan beragama inilah akan menjadikan bangsa dan negara ini sebagai satu bangsa dan negara yang berdaulat. Perlembagaan Persekutuan Perkara 3 (1) memperuntukkan bahawa Islam adalah agama bagi Persekutuan, tetapi agama dan kepercayaan-kepercayaan lain boleh diamalkan dengan aman dan damai di mana-mana bahagian Persekutuan. Manakala Perkara 11(1) Perlembagaan Persekutuan memperuntukkan bahawa, tiap-tiap orang adalah berhak menganuti dan mengamalkan agamanya dan, tertakluk kepada Fasal (4), mengembangkannya. Tindakan membeza-bezakan terhadap seseorang warganegara atas alasan atau perihal agama adalah dilarang sama sekali.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT**

---

**PERTANYAAN : BUKAN LISAN**

**DARIPADA : TUAN WILLIE ANAK MONGIN  
[PUNCAK BORNEO]**

**SOALAN NO. 484**

Minta **MENTERI HAL EHWAL EKONOMI** menyatakan bagaimana dengan situasi kewangan Lembaga Penyatuan Dan Pemulihan Tanah Persekutuan (FELCRA) Bhd dan apakah perancangan Kerajaan bagi menyusun semula pengurusan dan operasi FELCRA dan Apakah Perancangan FELCRA untuk Skim Penanaman Semula Kelapa Sawit bagi peserta di Kawasan Puncak Borneo.

**JAWAPAN**

Tuan Yang di-Pertua,

1. Dimaklumkan bahawa FELCRA kini sedang berhadapan dengan situasi kewangan yang kurang sihat ekoran daripada senario kejatuhan harga di pasaran global yang mencatatkan penurunan purata harga sawit daripada RM2,800 per metrik tan pada tahun 2017 kepada RM2,140 per metrik tan kini.
2. Pengurusan FELCRA adalah di dalam rangka menyusun dan memperkasakan operasi dan pengurusannya melalui beberapa langkah utama yang telah pun bermula iaitu:
  - (i) Menyusun semula dan melantik komposisi ahli-ahli Lembaga Pengarah dalam kalangan mereka yang berpengalaman luas dalam pelbagai bidang profesional dan korporat;

(ii) Menyusun semula struktur organisasi supaya lebih tepat dengan entiti FELCRA sebagai sebuah *social enterprise powerhouse* berteraskan perladangan;

(iii) Melaksanakan auditan pengurusan secara menyeluruh bagi mengenal pasti ketirisan dan salah laku. Beberapa penemuan untuk siasatan lanjut pihak Suruhanjaya Pencegahan Rasuah Malaysia (SPRM);

(iv) Memperkenal dan melaksanakan enam (6) arah tuju strategik yang melibatkan pemerkasaan dalam bidang-bidang seperti entiti FELCRA, operasi, sistem, modal insan staf, keyakinan peserta dan struktur organisasi; dan

(v) Memperkenal dan melaksanakan inisiatif-inisiatif pengurusan kewangan bagi jangka pendek, sederhana dan panjang bertujuan memperkukuhkan lagi kedudukan kewangan FELCRA.

3. Manakala bagi perancangan program tanam semula bagi projek FELCRA di bawah Parlimen Puncak Borneo iaitu Kawasan Kg. Belimbing akan dilaksanakan apabila tiba masanya (jangkaan 3 hingga 4 tahun dari sekarang), tertakluk kepada peruntukan pembangunan yang diperlukan dan juga penyelesaian status tanah di bawah *Native Custody Right* (NCR).

Sekian, terima kasih.

Kementerian Hal Ehwal Ekonomi  
11 April 2019

**PEMBERITAHUAN PERTANYAAN BUKAN LISAN DEWAN RAKYAT  
MESYUARAT PERTAMA, PENGGAL KEDUA  
PARLIMEN KEEMPAT BELAS**

---

**PERTANYAAN : BUKAN LISAN**

**DARIPADA : TUAN WILLIE ANAK MONGIN  
[ PUNCAK BORNEO ]**

**SOALAN NO. 485**

Tuan Willie anak Mongin [ Puncak Borneo ] minta **MENTERI PENDIDIKAN** menyatakan status cadangan pembinaan SK Serumbu, Bau yang telah dicadangan dan bila ia akan dilaksanakan. Adakah juga pihak Kementerian Pendidikan bercadang untuk membina satu lagi Sekolah Menengah Kebangsaan (SMK) di Kawasan Puncak Borneo, memandangkan kebanyakan sekolah-sekolah di dalam kawasan Puncak Borneo amat sesak.

**JAWAPAN**

Untuk makluman Ahli Yang Berhormat,

Kementerian Pendidikan Malaysia (KPM) melalui Jabatan Pendidikan Negeri (JPN) Sarawak sedang dalam proses kajian bagi mengenal pasti keperluan pembinaan Sekolah Menengah Kebangsaan (SMK) Puncak Borneo. Sekiranya terdapat keperluan, hasil kajian akan digunakan untuk sokongan bagi cadangan pembinaan SMK Puncak Borneo dalam Rancangan Malaysia (RM) seterusnya. Walau bagaimanapun, KPM telah meluluskan permohonan bagi projek pembinaan tambahan 12 bilik darjah, ubah suai naik taraf asrama dan kemudahan lain di SMK Padawan dalam projek RMKe-11 *rolling plan* 4 bagi menampung keperluan pertambahan murid di sekolah menengah tersebut. Status semasa projek tersebut ialah masih dalam peringkat perancangan.

**PEMBERITAHUAN PERTANYAAN DEWAN RAKYAT MALAYSIA**

**PERTANYAAN : BUKAN LISAN**

**DARIPADA : TUAN WILLIE ANAK MONGIN  
[ PUNCAK BORNEO ]**

**NO. SOALAN : 486**

minta **MENTERI PEMBANGUNAN LUAR BANDAR** menyatakan sama ada pemilihan ketua kampung atau pemilihan Majlis Pengurusan Komuniti Kampung (MPKK) akan diadakan bagi seluruh negara termasuk Sabah dan Sarawak.

**JAWAPAN**

Untuk makluman Yang Berhormat, Kementerian Pembangunan Luar Bandar (KPLB) tidak bercadang untuk mengadakan pemilihan MPKK kerana kuasa pemilihan atau pelantikan Anggota MPKK termasuk Pengerusi, Setiausaha dan Ahli Jawatankuasa adalah sepenuhnya di bawah bidang kuasa Kerajaan Negeri masing-masing.

Pelantikan Anggota MPKK telah pun dilaksanakan di seluruh negara sama ada secara penuh atau berfasa mengikut kaedah yang ditentukan oleh Kerajaan Negeri masing-masing.

**PEMBERITAHUAN PERTANYAAN BUKAN LISAN DEWAN RAKYAT**

**PERTANYAAN : BUKAN LISAN**

**DARIPADA : TUAN WILLIE ANAK MONGIN [PUNCAK BORNEO]**

**SOALAN NO. 487**

Minta **MENTERI KESIHATAN** menyatakan dengan menyenaraikan (mengikut negeri) klinik-klinik Kerajaan yang terletak dalam lingkungan 3km daripada penempatan Bumiputera (kawasan pedalaman Sabah dan Sarawak), serta rancangan untuk membina klinik baru bagi kampung/penempatan yang lain. Apakah perancangan dan bilakah Kementerian Kesihatan untuk menaik - taraf Klinik Desa Kpg Bunuk dan Klinik Desa Krokong, Bau yang usang dan daif.

**JAWAPAN**

**Yang di-Pertua,**

Kementerian Kesihatan Malaysia (KKM) menyediakan perkhidmatan klinik statik dan juga pasukan klinik bergerak ke kawasan-kawasan pedalaman di mana penduduk mempunyai kesukaran akses untuk mendapatkan perkhidmatan kesihatan dari klinik statik.

Di Sabah, terdapat 42 pasukan klinik bergerak yang menyediakan perkhidmatan ini melalui darat (35 pasukan), air (5 pasukan) dan udara (2 pasukan). Empat (4) daripada lima (5) pasukan klinik bergerak melalui air menyediakan perkhidmatan menggunakan bot yang telah diubah suai menjadi sebuah klinik iaitu di Semporna (1) dan Sungai Kinabatangan (1). Manakala penduduk di kawasan Keningau, disediakan perkhidmatan kesihatan menggunakan sebuah bas yang diubahsuai menjadi klinik.

Bagi klinik statik pula, di seluruh Sabah, kini terdapat 333 buah klinik yang meliputi Klinik Kesihatan, Klinik Kesihatan Ibu Anak, Klinik Desa dan Klinik Komuniti.

## **NO SOALAN : 487**

Di Sarawak, jumlah pasukan klinik bergerak adalah sebanyak 103. Pasukan ini menyediakan perkhidmatan kesihatan melalui darat (65 pasukan), air (29 pasukan) dan udara (9 pasukan). Perkhidmatan Doktor udara disediakan bagi kawasan yang sukar dihubungi dengan kemudahan pengangkutan darat atau pun air ke kawasan pedalaman.

Bagi klinik statik pula, di seluruh Sarawak, kini terdapat 274 buah klinik yang meliputi Klinik Kesihatan, Klinik Kesihatan Ibu Anak, Klinik Desa dan Klinik Komuniti.

Kementerian Kesihatan juga sentiasa giat berusaha untuk menaik taraf perkhidmatan kesihatan di kesemua fasilitinya. Klinik Kesihatan Bunuk ini telah pun dibuat pelbagai penambahbaikan prasarana, perkhidmatan dan juga penambahan pegawai perubatan untuk memastikan perkhidmatan berkualiti diberikan kepada penduduk sekitarnya. Manakala, Klinik Kesihatan Krokong yang pada mulanya berfungsi sebagai Klinik Desa namun telah dinaiktaraf kepada Klinik Kesihatan pada tahun 2013. Sehingga kini, klinik-klinik ini berupaya daripada segi prasarana dan tenaga kerja untuk menampung keperluan kesihatan penduduk setempat.

Sekian, terima kasih.

**PEMBERITAHUAN PERTANYAAN DEWAN RAKYAT**

---

**PERTANYAAN : BUKAN JAWAB LISAN**

**DARIPADA : TUAN WONG CHEN [ SUBANG ]**

**SOALAN : 488**

**Tuan Wong Chen [ Subang ]** minta **MENTERI DALAM NEGERI** menyatakan adakah Kerajaan akan mengenyahkan jenayah cubaan bunuh diri memandangkan undang-undang yang sedia ada tidak efektif dan tidak membantu menyelesaikan masalah mangsa yang terlibat.

**JAWAPAN**

Tuan Yang di-Pertua,

Kes cubaan untuk membunuh diri di kalangan penduduk negara ini adalah disebabkan oleh pelbagai faktor seperti masalah kewangan, tekanan jiwa, kecewa dalam percintaan, masalah keluarga dan sebagainya. Perbuatan ini diklasifikasikan sebagai suatu kesalahan di bawah seksyen 309 Kanun Keseksaan yang boleh membawa hukuman penjara satu tahun atau dengan denda atau kedua-duanya sekali.

Statistik kes cubaan membunuh diri pada tahun 2017 seramai 256 orang dan pada tahun 2018 adalah seramai 261 orang. Secara keseluruhannya bagi tahun 2017 dan tahun 2018, individu yang terlibat dalam kes cubaan membunuh diri yang berumur di bawah 18 tahun adalah seramai 48 orang, berumur antara 19 tahun ke 40 tahun seramai 371 orang dan yang berumur 41 ke atas seramai 98 orang.

Kementerian berpandangan bahawa kesalahan bagi cubaan membunuh diri masih lagi relevan untuk dilakukan siasatan oleh pihak polis walaupun jarang sekali kesalahan ini dibuat pertuduhan di mahkamah. Statistik siasatan yang dibuat di bawah seksyen 309 Kanun Keseksaan boleh digunakan sebagai panduan untuk mengetahui punca mengapa individu terbabit nekad mengambil tindakan sehingga sanggup membunuh diri. Melalui data yang diperolehi, analisa boleh dibuat oleh pihak tertentu untuk tujuan pencegahan.



**PEMBERITAHUAN PERTANYAAN DEWAN RAKYAT**

**PERTANYAAN : BUKAN LISAN**

**DARIPADA : TUAN WONG CHEN [ SUBANG ]**

**SOALAN : 489**

**Tuan Wong Chen [ Subang ]** minta **Perdana Menteri** menyatakan adakah Kerajaan bersetuju untuk menukar cuti bersalin kepada cuti ibu bapa yang mana cuti 90 hari boleh dikongsi di antara suami dan isteri yang bekerja di sektor awam.

**JAWAPAN: YB DATUK WIRA DR. MD FARID BIN MD RAFIK**  
**TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, kemudahan Cuti Bersalin diberikan kepada pegawai perkhidmatan awam wanita supaya pegawai berkenaan bersedia dan dapat pulih sepenuhnya selepas bersalin. Tempoh Cuti Bersalin yang layak dinikmati oleh pegawai perkhidmatan awam wanita adalah selama 360 hari maksimum dan pegawai diberi fleksibiliti menentukan sendiri tempoh Cuti Bersalin bergaji penuh yang ingin diambil bagi setiap kelahiran iaitu di antara 60 hari sehingga 90 hari.

Berdasarkan prinsip pemberian Cuti Bersalin yang diperjelaskan di atas, Kerajaan berpandangan bahawa cadangan untuk menukar Cuti Bersalin kepada cuti ibu bapa yang boleh dikongsi antara suami dan isteri yang bekerja di sektor awam adalah tidak sesuai untuk dilaksanakan.

Sekian, terima kasih.

**PEMBERITAHUAN PERTANYAAN DEWAN RAKYAT**

**PERTANYAAN : BUKAN LISAN**

**DARIPADA : TUAN WONG CHEN (SUBANG)**

**SOALAN : NO. 490**

**TUAN WONG CHEN [Subang]** minta **PERDANA MENTERI** menyatakan adakah Kerajaan akan menggabung kesemua program kebajikan di bawah satu kementerian memandangkan kini terdapat pelbagai program kebajikan di pelbagai Kementerian. Ini akan mengurangkan kos pentadbiran dan memudahkan pembayaran dibuat kepada golongan miskin.

**JAWAPAN: YB DATUK WIRA DR. MD FARID BIN MD RAFIK**  
**TIMBALAN MENTERI DI JABATAN PERDANA MENTERI**

---

Tuan Yang di-Pertua,

Setiap kementerian/agensi mempunyai fokus dan kumpulan sasar masing-masing. Sebagai contoh, Kementerian Pembangunan Wanita, Keluarga dan Masyarakat memberi fokus kepada kebajikan kumpulan wanita dan keluarga yang mana fokus ini berbeza dengan kementerian yang lain seperti Kementerian Pembangunan Luar Bandar dan Wilayah serta Kementerian Perumahan dan Kerajaan Tempatan.

Walau bagaimanapun, sehingga kini penyelarasan dari segi data telah dilaksanakan oleh pihak Kerajaan di mana Kerajaan telah membangunkan Sistem eKasih sebagai satu pangkalan data kemiskinan nasional yang bertujuan untuk mendaftarkan golongan miskin di Malaysia dan mengklasifikasikan kepada kategori Miskin Tegar atau Miskin berdasarkan Pendapatan Garis Kemiskinan (PGK) semasa melalui proses verifikasi di lapangan.